

**Naalakkersuisut 2015-mut Aningaasanut Inatsimmi Nuummi atlantiku ikaarlugu timmisartunut suluusalinnut mittarfiornissap misissorneqarnissaanut aningaasaleeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Andreas Uldum, Demokraatit)

**Akissuteqaat**

(Peqqissutsimut Attaveqarnermullu Naalakkersuisoq)

**Siullermeerinnineq**

Andreas Uldum aalajangiiffigisassatut siunnersuummik saqqummiussineranut qutsavigaara.

Nuummi imarpik qulaallugu timmisartunut mittarfiliornissaq pisariaqartinneqartoq Naalakkersuisut Demokraatit isumaqatigaat, aammalu isumaqarlutik siunnersuut Assartuussineq pillugu Isumalioqatigiissitap isumaliutissiisutaani Nuummi imarpik qulaallugu mittarfiliornissaq pillugu inassuteqaataasunut kiisalu illoqarfimmi inuussutissarsiortunit kissaatigineqartunut naapertuulluarpoq. Aammattaaq Isuani saviminissarsiorfissap Nuummi mittarfimmi annertunerusumik inissaqartitsinissamut pisariaqartitsineq annertunerulersissinnaavaa.

Nuummi imarpik qulaallugu mittarfiliornissamut tunngatillugu misissueqqissaarnernik arlaqartunik maannakkut peqareerpoq. Kingullermik inatsisilerinikkut silamullu tunngatillugu nalilersuinerit, mittarfimmut tunngatillugu aalajangiinissamut suliap ingerlanerani tunngavissanut ilaasinnaasut suliarineqarput.

Aammattaaq Assartuussineq pillugu Isumalioqatigiissitap isumaliutissiisutaata malitseqartinneqarneratut aningaasanut inatsimmi kontomi 87.11.09-imi misissueqqaarnissanut aningaasanik immikkoortitsisoqarpoq, misissueqqissaarnerit annertunerusut pisariaqartut paasinarsissagaluarpat atorneqarsinnaasunik. Taamaattumik maannakkorpiaq Naalakkersuisut naliliipput, Nuummi imarpik qulaallugu mittarfimmik inissiinissamut misissueqqaarnissanut aningaasanik annertunerusunik immikkoortitsinissaq pisariaqanngitsoq.

Tamatuma saniatigut Qaqortup eqqaani mittarfissamut tunngatillugu 2014-imi ukiaanerani ataatsimiinnissamut aalajangiiffigisassatut siunnersuut maannangaaq suliarineqaleruttormat Naalakkersuisut eqqumaffigeqqussavaat.

Piareersaalluni suliaqarnerup aningaasanut inatsimmi aningaasat immikkoortinneqareersut aallaavigalugit aalajangiiffigisassatut siunnersuummut tunngavissiisussap pingaarnerutinneqarnissaa inaarsarneqarnissaalu Naalakkersuisut kissaatigaat. Tamanna

tunngavigalugu saqqummiunneqartumut allannguutissatut siunnersuut Naalakkersuisut inassutigaa, taamaalillutik Naalakkersuisut sinaakktissat pioreersut iluanni Nuummi imarpik qulaallugu timmisartunut mittarfimmut tunngatillugu aalajangiiffigisassatut siunnersuutip inaarsarneqarnissaanut aningaasassanik pisariaqartunik pingaarnersiuiinermi salliutitsinissaannik Inatsisartunit peqquneqassallutik. Siunnersuutip oqaasertaa taamaalilluni imatut nipeqassaaq:

Tamanna tunngavigalugu Naalakkersuisut inassutigaa, siunnersuut itigartinneqassasoq.

Naalakkersuisut imaattoq allannguutissatut siunnersuutigissavaat:

Nuummi imarpik qulaallugu timmisartunut mittarfissaq pillugu aalajangiisoqarsinnaanissaanut misissueqqissaarnerit pisariaqartut suliarineqarnerisa inaarsarneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.